



KEMENTERIAN BELIA DAN SUKAN

KBS: 83/2025

SIARAN MEDIA

ASEAN YOUTH LEADERSHIP CONFERENCE 2025 ***150 Pemimpin Muda ASEAN Berhimpun di Kuala Lumpur,*** ***Bincang Kepimpinan Masa Depan***

17 OKTOBER 2025

-
1. Sempena Kepengerusian ASEAN Malaysia Tahun 2025, Kementerian Belia dan Sukan (KBS) telah menganjurkan “ASEAN Youth Leadership Conference” (AYLC) 2025 pada 17 hingga 18 Oktober 2025 bertempat di Royale Chulan Kuala Lumpur. Program ini telah dirasmikan oleh YB Adam Adli Abd Halim, Timbalan Menteri Belia dan Sukan.
 2. Persidangan bertemakan “Next-Gen Leadership: Leading with Inclusivity & Sustainability” ini menzahirkan komitmen Malaysia untuk melahirkan pemimpin muda yang berintegriti, berdaya cipta dan berwawasan. Selaras dengan nilai kerangka Malaysia MADANI, beberapa penekanan aspek telah diberi terutama dari segi kemampanan, hormat dan ihsan dalam membentuk generasi pemimpin yang mampu bekerjasama merentas budaya serta memainkan peranan di peringkat global.
 3. Persidangan ini menghimpunkan lebih 150 peserta yang terdiri daripada wakil pemimpin muda ASEAN, pertubuhan bukan kerajaan (NGO), pemimpin pelajar dan profesional muda tempatan. Mereka berkongsi pandangan, idea dan strategi ke arah membentuk kepimpinan belia yang inklusif, inovatif dan berorientasikan impak lestari.
 4. Penganjuran ini juga selari dengan aspirasi KBS dalam pelaksanaan transisi umur belia dan memperkasa peranan belia bukan sekadar sebagai pemimpin masa depan, tetapi pemacu utama perubahan sosial, ekonomi dan teknologi pada masa kini.

5. Matlamat utama persidangan ini adalah untuk:
 - menerapkan nilai kepimpinan belia beretika dan bersedia menghadapi cabaran masa depan;
 - menggalakkan inovasi belia melalui kepimpinan digital dan kecerdasan buatan (Artificial Intelligence) bagi impak sosial mampan; dan
 - memperkasa belia untuk menerajui tindakan iklim serta agenda kelestarian selaras dengan Matlamat Pembangunan Mampan (Sustainable Development Goals, SDGs).
6. Persidangan kali ini turut menampilkan Emerita Professor Tan Sri Dato' Seri Dr. Mazlan binti Othman, Felo Kanan Akademi Sains Malaysia dan ahli astrofizik pertama Malaysia, yang membentangkan ucapnama persidangan.
7. Antara topik lain yang turut dibincangkan dalam persidangan ini merangkumi:
 - Kepimpinan berasaskan nilai dan pembinaan karakter;
 - Literasi digital dan kepimpinan teknologi; dan
 - Kepimpinan belia untuk SDGs dan impak sosial.
8. Persidangan AYLC 2025 turut menampilkan barisan panel antarabangsa dari negara-negara ASEAN dan Korea Selatan yang berpengalaman luas dalam bidang kepimpinan belia. Persidangan ini menjadi platform strategik bagi memperkukuh jaringan serantau serta menyemai nilai integriti, inovasi dan kelestarian dalam kalangan belia ASEAN.
9. KBS yakin AYLC 2025 mampu melahirkan barisan pemimpin belia yang bersedia menghadapi cabaran global ke arah mencorak masa depan rantau secara inklusif, progresif dan bertanggungjawab. Untuk maklumat lanjut, sila hubungi Sekretariat AYLC 2025, Jabatan Belia dan Sukan Negara (JBSN) di talian 03-8871 3317 atau e-mel ke secretariataylc@kbs.gov.my.